



Pranimi / Dorëzuar Primijseno/Prodato Received/Delivery	29.12.2023	3	viti god year
Organ /Njesia Organ /Jedinica Org./Unit	Nr Prot Br Prot Prot No	Shtojca Prilog Appendix	Sasia Kolicina Quantity
SKPM/SHCK	7736/2023		1/5

Republika e Kosovës
Republika Kosova-Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVA

A.nr.1233/2023

Këshilli i Pavarur Mbikëqyrës për Shërbimin Civil të Kosovës- Kolegji për Shqyrtimin dhe Vendosjen e Ankesave i përbërë nga: Malsore Gashi-Bajraktari- kryetare, Arben Mehmeti dhe Ardita Haxhnikaj-Demi-anëtar me Ardita Perçuku-Shyti-Zyrtare e lartë për bashkëpunim profesional, në cilësinë e procesmbajtëses sipas Aktgjykimit me numër A.nr.1634/2021, të datës 31.08.2023, të Gjykatës Themelore në Prishtinë-Departamenti për Çështje Administrative, kanë rishqyrtuar ankesën me numër A.nr.310/2021, të datës 27.04.2021, të ankuesit _____, të cilin me autorizim e përfaqëson Av _____ me adresë _____

kundër organit të punësimit Ministria e Punëve të Jashtme dhe Diasporës, në çështjen juridike "kërkesë nga marrëdhënia e punës", duke vepruar në pajtim me nenin 6 paragrafin 1.1 nënparagrafin 1.1, nenin 16 paragrafin 1 dhe nenin 18 paragrafin 1 nën paragrafin 1.8 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur më datën 28.12.2023, mori këtë:

V E N D I M

Pezullohet procedura administrative e nisur sipas ankesës A.nr.310/2021 të datës 27.04.2021 të ankuesit _____

A r s y e t i m

Ankuesi i punësuar në Ministrinë e Punëve të Jashtme dhe Diasporës, përmes përfaqësuesit të tij me datë 27.04.2021 ka parashtruar ankesë në Këshillin e Pavarur Mbikëqyrës për Shërbimin Civil të Kosovës, kundër Vendimit me numër Nr.25/2021 të datës 16.04.2021 të Zëvendëskryeminstres dhe Ministres së Ministrisë së Punëve të Jashtme dhe Diasporës lidhur me ndërprerjen e marrëdhënies së punës, me pretendimet ankimore për shkak të: shkeljeve esenciale procedurale, vërtetimit jo të plotë dhe të gabuar të gjendjes faktike dhe zbatimit të gabuar të së drejtës materiale.

Këshilli i Pavarur Mbikëqyrës për Shërbimin Civil të Kosovës, bazuar në dispozitat e Rregullores Nr. Nr.02/2018 për Procedurën e Shqyrtimit dhe Vendosjes së Ankesave, ankesën e ankuesit e ka proceduar me datë 29.04.2021 për përgjigje në ankesë në Ministrinë e Punëve të

Jashtme dhe Diasporës. ndërsa Këshilli me datë 11.05.2021 ka pranuar përgjigjen në ankesë nga Ministria e Punëve të Jashtme dhe Diasporës, së bashku me shkresat e bashkëngjitura të lëndës.

Ankuesi, më pas ka hapur konflikt administrativ kundër Vendimit të Këshillit të datës 28.05.2021, ndërsa Gjykata Themelore në Prishtinë-Departamenti për Çështje Administrative përmes Aktgjykimit A.nr.1634/2021 të datës 31.08.2023 ka aprovuar kërkesëpadinë e palës paditëse, e ka anuluar vendimin e Këshillit ndërsa lëndën e ka kthyer në rishqyrtim me kërkesën që Këshilli ta udhëzojë palën paditëse tek organi kompetente lidhur me kërkesën e saj për realizmin e të drejtës së tij në mjetet të rregullta juridike.

Kolegji për Shqyrtimin dhe Vendosjen e Ankesave, ka administruar këto prova: Aktgjykimin me numër A.nr.2130/21 të datës 31.08.2023 të Gjykatës Themelore në Prishtinë-Departamenti për Çështje Administrative; Përgjigjen në padi të datës 15.02.2023 nga Këshilli i Pavarur Mbikqyrës për Shërbimin Civil të Kosovës; Aktvendimin me numër A.nr.1634/21 të datës 01.12.2022 të Gjykatës Themelore në Prishtinë-Departamenti për Çështje Administrative; Padinë e paditësit-ankuesit të datës 21.07.2021; Vendimin me numër A.nr.310/2021 të datës 28.05.2021 të Këshillit të Pavarur Mbikqyrës për Shërbimin Civil të Kosovës; Ankesën e ankuesit të datës 27.04.2021 të parashtruar në Këshillin e Pavarur Mbikqyrës për Shërbimin Civil të Kosovës; Shkresën zyrtare me Nr.417/2019 të datës 21.08.2019 të Zëvendëskryeministrit të Parë dhe Ministrit të Punëve të Jashtme; Dekretin me Nr.255/2019 të datës 09.12.2019 të Presidentit të Republikës së Kosovës; Shkresën zyrtare me Nr.1651/1 të datës 09.12.2019 nga Zyra e Presidentit të Kosovës; Vendimin me Nr.Ref:275/2019 të datës 24.12.2019 të Zëvendëskryeministrit të Parë dhe Ministrit të Punëve të Jashtme; Shkresën zyrtare të datës 30.12.2019 nga Ambasada e Republikës së Maqedonisë së Veriut; Kartën e ID-së së ankuesit; Formularin e vlerësimit të nëpunësit të shërbimit të jashtëm për vitin 2020 të datës 28.10.2020; Vendimin me Nr.25/2021 të datës 16.04.2021 të Zëvendëskryeminstres dhe Ministres së Ministrisë së Punëve të Jashtme dhe Diasporës; Prokurën speciale të datës 26.04.2021 nga përfaqësuesi me autorizim; Kërkesën për përgjigje në ankesë të datës 29.04.2021 nga Këshilli i Pavarur Mbikqyrës për Shërbimin Civil të Kosovës; Përgjigjen në ankesë nga Ministria e Punëve të Jashtme dhe Diasporës së bashku me shkresat e bashkëngjitura të lëndës; Vendimin me Nr.Ref: 480/2019 të datës 04.12.2019 nga Zëvendëskryeministri i Parë dhe Ministri i Punëve të Jashtme; Shkresën zyrtare me numër 2242 të datës 27.11.2020 nga Presidenca e Kosovës si dhe Dekretin me numër 166/2020 të datës 25.11.2020 U.D Presidentes së Republikës së Kosovës.

Kolegji për shqyrtimin dhe vendosjen e ankesave, për vendosjen e kësaj çështje ka shqyrtuar të gjitha shkresat e lëndës të parashtruara nga palët dhe ka konstatuar se ka bazë të mjaftueshme ligjore si dhe ekzistojnë rrethana të reja të cilat e plotësojnë kushtin që vendimmarrja për lëndën A.nr.310/2021 e ankuesit të *pezullohet, sepse:*

Kolegji për Shqyrtimin dhe Vendosjen e Ankesave në bazë të shkresave të lëndës ka konstatuar se ankuesi sipas Dekretit me numër 255/2019 të Presidentit të Republikës së Kosovës me datën 09.12.2019, është emëruar "Konsull i Përgjithshëm" në Republikën e Maqedonisë Veriore me seli ne Shkup. Me datën 25.11.2020, Ushtruesja e Detyrës së Presidentit të Kosovës, ka nxjerr dekretin me numër 166/2020, me të cilin e ka shfuqizuar dekretin me numër Nr.255/2019 të datës 09.12.2019, lidhur me emërimin e ankuesit në pozitën Konsull i Përgjithshëm në Republikën e Maqedonisë së Veriut.

Me datën 16.04.2021, Zëvendës Kryeministrja dhe Ministria e Ministrisë së Punëve të Jashtme dhe Diasporës, ka nxjerr vendimin me numër Nr.25/2021, me të cilin e ka liruar nga pozita e Konsullit të Përgjithshëm ankuesin nga Republika e Maqedonisë së Veriut në Shkup, me qëllim të zbatimit të dekretit me numër 166/2020, të ushtrues së detyrës së Presidentes së Republikës së Kosovës.

Ankuesi i pakënaqur me vendimin me numër Nr.25/2021 të datës 16.04.2021, të Ministres së Ministrisë së Punëve të Jashtme dhe Diasporës, me datën 27.04.2021, ka parashtruar ankesë me numër të protokollit 1853/2020 në Këshillin e Pavarur Mbikëqyrës për Shërbimin Civil të Kosovës.

Pas trajtimit të ankesës së ankuesit të datës 27.04.2021, Këshilli përmes Vendimit me shenjë A.nr.310/2021 të datës 28.02.2021 është shpallur jo kompetentë, kurse ankuesi më pas ka hapur konflikt administrativ kundër Vendimit të Këshillit, ndërsa Gjykata Themelore në Prishtinë-Departamenti për Çështje Administrative përmes Aktgjykimit A.nr.1634/2021 të datës 31.08.2023 ka aprovuar kërkesëpadinë e palës paditës, e ka anuluar vendimin e Këshillit ndërsa lëndën e ka kthyer në rishqyrtim më kërkesën që Këshilli ta udhëzojë palën paditëse tek organi kompetente lidhur me kërkesën e saj për realizmin e të drejtës së tij.

Kolegji për Shqyrtimin dhe Vendosjen e Ankesave thekson faktin se Këshilli përmes Vendimit me numër A.nr.365/2022 të datës 10.06.2022 me shumicë votash kishte vendosur të shpallet jo kompetentë për të shqyrtuar ankesat e ankuesve:

dhe ndërsa për vendimin në fjalë njëri nga anëtarët e Kolegjit të Këshillit kishte paraqitur në formë të shkruar mendim mospajtues për natyrën e vendosjes i cili në Këshill është i evidentuar me shenjë A.nr.366/2022 i datës 10.06.2022 dhe numër protokollit:3386/2022. Andaj, bazuar në të dhënat me provat e bashkangjitura të dosjes së ankesave të ankuesve të bashkuara në ankesën A.nr.365/2022 dhe shkresave të lëndës së ankesës së ankuesit

A.nr.310/2021, Kolegji i Këshillit konstaton se arsyet e dhëna në vendimet e Zëvendës/Kryeministres dhe Ministres së Ministrisë së Punëve të Jashtme dhe Diasporës ne rastin e ndërprerjes së marrëdhënies së punës të ankuesve të evidentuar sipas Vendimit të Këshillit me shenjë A.nr.365/2022 janë specifikisht të njëjta sikurse rrethanat faktike dhe baza ligjore mbi bazën e të cilave është nxjerrë Vendimi me numër Nr.25 /2021 i datës 16.04.2021 përmes të cilit ankuesit i është ndërprerë marrëdhënia e punës.

Përfaqësuesit e autorizuar të palëve kundër Vendimit të Këshillit me numër A.nr.365/2022 të datës 10.06.2022 kanë parashtruar padi në Gjykatën Themelore në Prishtinë-Departamenti për Çështje Administrative, ndërsa kjo e fundit me datë 05.07.2022 ka nxjerrë Aktvendimin A.nr.1687/2022 përmes të cilit e ka shpallur vetën jo kompetent në pikëpamje të kompetencës lëndore, ndërsa pasi që i njëjti aktvendim të merr formë të prerë, lëndën do ta përcjellin në Departamentin e Përgjithshëm të Gjykatës Themelore në Prishtinë-Divizionit Civil, mirëpo përfaqësuesi i palëve paditëse kundër Aktvendimit A.nr.1687/2022 të Gjykatës Themelore në Prishtinë-Departamenti për Çështje Administrative, me datë 28.07.2022 ka parashtruar ankesë në Gjykatën e Apelit të Kosovës.

Gjykatat e Apelit të Kosovës përmes Aktvendimit 597/2022 të datës 25.08.2022 ka vërtetuar Aktvendimin A.nr.1687/2022 të Gjykatës Themelore në Prishtinë-Departamenti për Çështje Administrative, ndërsa e ka refuzuar ankesën e palëve paditëse. Palët paditëse kundër

Aktvendimit A.nr.597/2022 të datës 25.08.2022 të Gjykatës së Apelit të Kosovës kanë parashtruar ankesë në Gjykatën Supreme, kurse kjo e fundit me datë 09.11.2022 ka nxjerrë Aktgjykimin me shifër ARJ-UZVP.nr.115/2022 përmes të cilit i ka prishur Aktvendimin A.nr.1687/2022 të Gjykatës Themelore në Prishtinës-Departamenti për Çështje Administrative dhe Aktvendimin A.nr.597/2022 të datës 25.08.2022 të Gjykatës së Apelit të Kosovës ndërsa lëndën e ka kthyer për shqyrtim të mëtutjeshëm në shkallën e parë.

Duke vepruar sipas Aktgjykimit me shifër Arj-UZVP.nr.115/2022 të Gjykatës Supreme, të datës 09.11.2022, Gjykata Themelore në Prishtinë-Departamenti për Çështje Administrative me datë 22.03.2023 ka nxjerrë Aktvendimin A.nr.1687/2022 përmes të cilit vendim e ka refuzuar kërkesën e palëve paditëse për mosekzekutimin e vendimit të Këshillit deri në nxjerrjen e vendimit meritor të procesit gjyqësor.

Meqenëse në Gjykatën Themelore në Prishtinë-Departamenti për Çështje Administrative është duke u trajtuar meritorisht Vendimi A.nr.365/2022 i datës 10.06.2022 i Këshillit për çështje të njëjtë sikurse të kësaj lënde sipas pikëpamjeve juridike të Aktgjykimit të lartcekur të Gjykatës Supreme të Kosovës, ku Këshilli ishte shpallur jo kompetent për të shqyrtuar ankesat e ankuesve të cilëve iu ishte ndërprerë marrëdhënia e punës nga ana e Zëvendës/Kryeministres dhe Ministres së Punëve të Jashtme janë specifikisht të njëjta sikurse rrethanat faktike dhe baza ligjore mbi bazën e të cilave është nxjerrë Vendimi me numër Nr.25/2021 i datës 16.04.2021 përmes të cilit ankuesit [redacted] i është ndërprerë marrëdhënia e punës, andaj Kolegji i Këshillit në mbështetje të nenit 85 paragrafit 1 të Ligjit Nr.05/L-031 për Procedurën e Përgjithshme Administrative i cili përcakton se: *"Kur organi publik që zhvillon procedurën has në një çështje, zgjidhja e së cilës është parakusht për zgjidhjen e çështjes kryesore dhe e cila përbën një çështje juridike të pavarur (në vijim: "çështje paraprake"), për zgjidhjen e së cilës është kompetente një gjykatë apo organ tjetër, organi publik që zhvillon procedurën do të pezullojë çështjen kryesore, deri sa çështja paraprake të jetë vendosur dhe do të njoftojë palën për vendimin e pezullimit"*, konstaton se ekzistojnë rrethana të mjaftueshme që shqyrtimi i lëndës A.nr.310/2021 të pezullohet deri në vendosjen meritorisht nga Gjykata Themelore në Prishtinës-Departamenti për Çështje Administrative sipas pikëpamjeve juridike të Gjykatës Supreme të Kosovës, pasi që objekti i shqyrtimit (*ndërprerja e marrëdhënies së punës duke iu referuar procedurave të rekrutimit sipas konkursit të datës 22.07.2011 të shpallur nga MPJ*) respektivisht baza ligjore dhe rrethanat mbi të cilat është nxjerrë Vendimi i datës 16.04.2021 me Nr.25/2021 nga Zëvendës/Kryeministrja dhe Ministrja e Ministrisë së Punëve të Jashtme dhe Diasporës janë të njëjta dhe shërben si parakusht për zgjedhjen e çështjes kryesore.

Këshilli i Pavarur Mbikëqyrës i Shërbimit Civil të Kosovës, pas vendosjes së rastit nga Gjykata Themelore në Prishtinës-Departamenti për Çështje Administrative dhe përfundimit të çështjes në instanca gjyqësore, Këshilli sipas detyrës zyrtare do të aktivizojë dhe do të vendos edhe për lëndën A.nr.310/2021 të datës 27.04.2021 të ankuesit [redacted]

Prandaj, Kolegji për Shqyrtimin dhe Vendosjen e Ankesave pas analizimit të provave të lëndës dhe konstatimeve të dhëna si më lartë, e duke u bazuar në nenin 18 paragrafi 1 nënparagrafi 1.9 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, vendosi si në dispozitiv të këtij vendimi.

Këshillë juridike: Vendimi hyn në fuqi në ditën e nënshkrimit nga Kryetarja e Kolegjit. Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në gjykatën kompetente, Gjykatën Themelore në Prishtinë/ Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS

Lënda me numër A.nr.1233/2023.

Ardita Perçuku-Shyti

Procesmbajtëse

Malsore GASHI-BAJRAKTARI

Kryetare e Kolegjit



Vendimi i dërgohet:

- Ankuesit
- Sekretarit të Përgjithshëm të Ministrise së Puneve të Jashtme dhe Diaspores
- Udhëheqësit të Personelit në Ministrine e Puneve të Jashtme dhe Diaspores
- Arkivit të KPMSHCK-së